



詩所第二十七卷

五言古詩

清河作

魏文帝

方舟戲長水湛

一作澹

自浮沈絃歌發中流悲響有

一作

風漂餘音音聲入君懷悽愴傷人心心傷安所念但願恩情深願為晨風鳥雙飛翔北林

途中作

一云行詩

晉成公綏

洋洋熊耳流巍巍伊闕山高岡碣崔嵬雙阜夾長川素石何磷磷木禽何翩翩遠涉許潁路顧思邈綿綿鬱陶懷所親引領情緬然

北芒客舍

劉伶

五言古詩 卷二十一
一
泱泱望舒隱黠黠玄夜陰寒雞思天曙擁翅吹長音蚊
蚋歸豐草枯葉散蕭林陳醴發悴顏色飲暢真心緼被
終不曉斯歎信難任何以除斯歎付之與瑟琴長笛響
中夕聞此消胸襟

赴洛 二首

陸機

希世無高符營道無烈心靖端肅有命假檝越江潭親
友贈予邁揮淚廣川陰撫膺解攜手永歎結遺音無迹
有所匿寂寞聲必沈肆日眇不及緬然若雙潛南望泣
玄渚北邁涉長林谷風拂修薄油雲翳高岑疊疊孤獸
騁嚶嚶思鳥吟感物戀堂室離思一何深佇立慨我歎

寤寐滫盈衿惜無懷歸志辛苦誰爲心符一作節

羈旅遠遊宦託身承華側撫劍遵銅輦振纓盡祗肅歲
月一何易寒暑忽已革載離多悲心感物情悽惻慷慨

遺安豫一作念永歎廢寢一作餐食思樂樂難誘日歸歸未

克憂苦欲何爲纏綿胸與臆仰瞻凌霄鳥美爾歸飛翼

赴洛道中作 二首

總轡登長路嗚咽辭密親借問子何之世網嬰我身永
歎遵北渚遺思結南津行行遂已遠野途曠無人山澤
紛紆餘林薄杳阡眠虎嘯深谷底雞鳴高樹巔哀風中
夜流孤獸更我前悲情觸物感沈思鬱纏綿佇立望故

五言古詩 卷二十一
鄉顧影悽自憐

遠遊越山川山川修且廣振策陟崇丘安轡遵平莽夕
息抱影寐朝徂銜思往頓轡倚高巖側聽悲風響清露
墜素輝明月一何朗撫枕不能寐振衣獨長想

吳王郎中時從梁陳作

在昔蒙嘉運矯迹入崇賢假翼鳴鳳條濯足升龍淵玄
冕無醜士冶服使我妍輕劍拂鞞厲長纓麗且鮮誰謂
伏事淺契濶踰三年薄言肅後命改服就藩臣夙駕尋
清軌遠遊越梁陳感物多遠念慷慨懷古人

出西城

遨遊出西城按轡循都邑逝物隨節改時風肅且熠遷
化有常然盛衰自相襲靡靡年時改冉冉老已及行矣
勉良圖使爾修名立

河陽縣作

二一首

潘岳

微身輕蟬翼弱冠忝嘉招在疚妨賢路再升上宰朝猥

荷公叔舉連

一作違

陪廁王寮長嘯歸東山擁耒耨時苗

幽谷茂織葛峻巖敷榮條落英隕林趾飛莖秀陵喬卑
高亦何常升降在一朝徒恨良時泰小人道遂消譬如
野田蓬幹流隨風飄昔倦都邑游今掌河朔徑登城眷
南顧凱風揚微綃洪流何浩蕩修芒鬱岩堯誰謂晉京

遠室邇身實遼誰謂邑宰輕令名患不劭人生天地間
百年孰能要頰一作歛如槁一作斂石火瞥若截道飈齊都
無遺聲桐鄉有餘謔福謙在純約害盈由矜驕雖無君
人德視民庶不忮

日夕陰雲起登城望洪河川氣冒山嶺驚湍激巖阿歸

鴈映蘭時

一作詩

游魚動圓波鳴蟬厲寒音時菊耀秋華

引領望京室南路在伐柯大厦緬無覲崇芒鬱嵯峨總
總都邑人擾擾俗化訛依水類浮萍寄松似懸蘿朱博
糾舒慢楚風被琅邪曲蓬何以直託身依叢麻黔黎竟
何常政成在民和位同單父邑愧無子賤歌豈敢陋微

官但恐忝所荷

在懷縣作

二首

南陸迎修景朱明送末垂初伏啓新節隆暑方赫曦朝
想慶雲興夕遲白日移揮汗辭中宇登城臨清池涼飈
自遠集輕襟隨風吹靈圃耀華果通衢列高椅瓜瓞蔓
長苞薑芋紛廣畦稻栽肅芊芊黍苗何離離虛薄乏時
用位微名日卑驅役宰兩邑政績竟無施自我違京輦
四載迄于斯器非廊廟姿屢出固其宜徒懷越鳥志眷
戀想南枝

春秋代遷逝四運紛可喜寵辱易不驚戀本難爲思我

千里餘目倦川途異心念山澤居望雲慙高鳥臨水愧
遊魚真想初在襟誰謂形跡拘聊且憑化遷終返班生
廬

辛丑歲七月赴假還江陵夜行塗口作

閒居三十載遂與塵事冥詩書敦宿好林園無俗情如
何捨此去遥遥至南一作西荆叩柅新秋月臨流別友生

涼風起將夕夜景湛虛明昭昭天宇濶晶晶川上平懷
役不遑寐中宵尚孤征商歌非吾事依依在耦耕投冠
旋舊墟不爲好爵榮一作榮養真衡茅下庶以善自名

乙巳歲三月爲建威叅軍使都經錢溪

我不踐斯境歲月好已積晨夕看山川事事悉如昔微
雨洗高林清飈矯雲翮眷彼品物存義風都未隔伊余
何爲者勉勵從茲役一形似有制素襟不可易園田日
夢想安得久離析終懷在歸一作壑舟諒哉宜一作負霜柏

帆入南湖

湛方生

彭蠡紀三江廬岳主衆阜白沙淨川路青松蔚巖首此
水何時流此山何時有人運互推遷茲器獨長久悠悠
宇宙中古今迭先後

還都帆

高岳萬丈峻長湖千里清白沙窮年潔林松冬夏青水

無暫停流木有千載貞寤言賦新詩忽忘羈客一作情

濟曲阿後湖

宋孝武帝

宵登毗陵路日過雲陽郭平湖曠津濟菰渚迭明蕪和風翼歸采夕氛晦山嶠驚瀾翻魚藻頽霞照桑榆

北使洛

顏延之

改服飭徒旅首路跼險艱振楫發吳洲秣馬陵楚山塗出梁宋郊道由周鄭間前登陽城路日夕望三川在昔輟期運經始濶聖賢伊瀝絕津濟臺館無尺椽宮陛多巢穴城闕生雲烟王猷升八表嗟行方暮年陰風振涼野飛雲翳窮天臨塗未及引置酒慘無言隱憫徒御悲

威遲良馬煩遊役去芳時歸來屢徂讐蓬心既已矣飛薄殊亦然

還至梁城作

眇默軌路長憔悴征戍勤昔邁先祖師今來後歸軍振策倦東路傾側不及羣息徒顧將夕極望梁陳分故國多喬木空城凝寒雲丘隴填郭郭銘誌滅無文本石扃幽闈黍苗延高墳惟彼雍門子吁嗟孟嘗君愚賤同堙滅尊貴誰獨聞曷為久游客憂念坐自殷

從駕頓上

謝莊

中權臨楚路前茅望吳雲冀馬依風蹠邊簫當夜聞

之郡初發都

謝靈運

述職期闌暑理棹變金素秋岸澄夕陰火旻團朝露辛
苦誰為情遊子值頽暮愛似莊念昔久敬曾存故如何
懷土心持此謝遠度李牧愧長袖郤克慙躡步良時不
見遺醜狀不成惡曰余亦支離依方早有慕生幸休明
世親蒙英達顧空班趙氏璧徒垂魏王瓠從來漸二紀
始得傍歸路將窮山海迹永絕賞心悟

初發石首城

白珪尚可磨斯言易為緇雖抱中孚爻猶勞貝錦詩寸
心若不亮微命察如絲日月垂光景成貸遂兼茲出宿
薄京畿晨裝搏曾颺重經平生別再與朋知辭故山日
已遠風波豈還時迢迢萬里帆茫茫終何之遊當羅浮
行息必廬霍期越海陵三山遊湘歷九嶷欽聖若旦暮
懷賢亦悽其皎皎明發心不為歲寒欺

隣里相送至方山

祗役出皇邑相期憇甌越解纜及流潮懷舊不能發析
析就衰林皎皎明秋月含情易為盈遇物難可歇積痼
謝生慮寡慾罕所闕資此永幽棲豈伊年歲別各勉日
新志音塵慰寂蔑

過始寧墅

五言古詩 卷二十七
東髮懷耿介逐物遂推遷違志似如昨二紀及茲年緇
磷謝清曠疲繭慙貞堅拙疾相倚薄還得靜者便剖竹
守滄海枉帆過舊山山行窮登頓水涉盡洄泐巖峭嶺
稠疊洲縈渚連綿白雲抱幽石綠篠媚清漣葺宇臨迴
江築觀基曾巔揮手告鄉曲三載期歸旋且爲樹枌櫨
無令孤願言

入東道路詩

整駕辭金門命旅惟詰朝懷居顧歸雲指塗泝行颺屬
值清明節榮華感和韶陵隰繁綠杞墟囿粲紅桃鷺鷥
翬方雉纖纖麥垂苗隱軫邑里密緇邈江海遼滿目皆

古事心賞貴所高魯連謝千金延州權去朝行路旣經
見願言寄吟誼

入彭蠡湖口

客遊倦水宿風潮難具論洲島驟迴合圻岸屢崩奔乘
月聽哀狔浥露馥芳蓀春晚綠野秀巖高白雲屯千念
集日夜萬感盈朝昏攀崖照石鏡牽葉入松門三江事
多往九派理空存靈物去珍恠異人秘精魂金膏滅明
光水碧綴一作輟流温徒作千里曲絃絕念彌敦

初往新安桐廬口

締綌雖淒其授衣尚未至感節良已深懷古亦云

一作徒役

五言古詩 卷二十七 九
思不有千里棹孰申百代意遠協尚子心遙得許生計
既及冷風善又卽秋水駛江山共開一作開曠雲日相照
媚景夕羣物清對玩咸可憇

富春渚

宵濟漁浦潭旦及富春郭定山緬雲霧赤亭無淹薄
遡流觸驚急臨圻阻參錯亮乏伯昏分險過呂梁壑
洊至宜便習兼山貴止託平生協幽期淪躓困微弱
久露干祿請始果遠遊諾宿心漸申寫萬事俱零落
懷抱旣昭曠外物徒龍蠖

發歸瀨三瀑布望兩溪

我行乘日垂放舟候月圓沫江免風濤涉清弄漪漣
積石竦兩溪飛泉倒三山亦旣窮登陟荒藹橫目前
窺巖不覩景披林豈見天陽鳥尚傾翰幽篁未爲遭
退尋平常時安知巢穴難風雨非攸恠擁志誰與宣
倘有同枝條此日卽千年

石壁精舍還湖中作

昏旦變氣候山水含清暉清暉能娛人游子憺忘歸
出谷日尚早入舟陽已微林壑歛暝色雲霞收夕霏
芰荷迭映蔚蒲稗相因依披拂趨南逕愉悅偃東扉
慮澹物自輕意愜理無違寄言攝生客試用此道推

白石巖下徑行田

小邑居易貧災年民無生知淺懼不周愛深憂在情舊
業橫海外蕪穢積頽齡饑饉不可久甘心務經營千頃
帶遠堤萬里瀉長汀洲流涓澮合連統塍埒并雖非楚
宮化荒闕亦黎萌雖非鄭白渠每歲望東京天鑿儻不
孤來茲驗微誠

初去郡

彭薛裁知耻貢公未遺榮或可優貪競豈足稱達生伊
余秉微尚拙訥謝浮名廬園當棲巖卑位代躬耕顧已
雖自許心迹猶未并無庸方一作妨周任有疾像長卿畢

娶類尚子薄遊似邴生恭承古人意促一作傲裝返柴荆

牽絲及元興解龜在景平負心二十載於今廢將迎理
棹遄還期遵渚鶩修坳溯溪終水涉登嶺始山行野曠
沙岸淨天高秋月明憇石挹飛泉攀林蹇落英戰勝懼
者肥鑿止流歸停卽是羲唐化獲我擊壤情一作聲

夜發石關亭

隨山踰千里浮溪將十夕鳥歸息舟楫星闌命行役亭
亭曉月映泠泠朝露滴

初發入南城

弄波不輟手玩景豈停目雖未登雲峯且以歡水宿

晚出西城

一作西射堂

步出西城

一作掖

門遙望城西岑連障疊巘崿青翠杳深

沈曉霜楓葉丹夕曛嵐氣陰節往感不淺感來念已深
羈雌戀舊侶迷鳥懷故林含情尚勞愛如何離賞心撫
鏡華緇鬢攬帶緩促衿安排徒空口幽獨賴鳴琴

登翻車峴

鮑照

高山絕雲霓深谷斷無光晝夜淪霧雨冬夏結寒霜淖
坂旣馬領磧路又羊腸畏塗疑旅人忌轍覆行箱升岑
望原陸四眺極川梁遊子思故居離客遲新鄉新知有
客慰追故遊子傷

登雲陽九里埭

宿心不復歸流年抱衰疾旣成雲雨人悲緒終不一徒
憶江南聲空錄齊后瑟方絕縈絃思豈見繞梁日

登黃鶴磯

木落江波寒鴈還風送秋臨流斷商絃瞰川悲棹謳適
郢無東轅還一作過夏有西浮三崖隱丹磴九派引滄流
淚竹感湘別弄珠懷漢遊豈伊藥餌泰得奪旅人憂

從臨海王上荆初發新渚

客行有苦樂但問客何行板龍不待翼附驥絕塵冥梁
珪分楚牧羽鷁指全荆雲艫掩江汜千里被連旌戾戾

五言古詩 卷二十一
旦風適嘈嘈晨鼓鳴收纜辭帝郊揚棹發皇京狐兔懷
志犬馬戀主情撫襟同太息相顧俱涕零奉役塗未
啓思歸思已盈

發後渚

江上氣早寒仲秋始霜雪從軍乏衣糧方冬與家別蕭
條背鄉心悽愴清渚發涼埃晦平臯飛潮隱修越孤光
獨徘徊空烟視昇滅塗隨前峯遠意逐後雲結華志分
馳年韶顏慘驚節推琴三起歎聲爲君斷絕

還都口號

分壤蕃帝華列正藹皇宮禮讌及年暇朝奏因歲通維
舟歇金景結棹俟昌風鉦歌首寒物歸吹踐開冬陰沈
烟塞合蕭瑟涼海空馳霜急歸節幽雲慘天容旌鼓貫
玄塗羽鷁被長江君王遲京國遊子思鄉邦恩世共渝
洽身願兩扳逢勉哉河濟客勤爾尺波功

還都道中

三首

悅懌遂還心踊躍貪至勤鳴鷄戒征路暮息落日分急
流騰飛沫回風起江濱孤獸啼夜侶離鴻噪霜羣物衰
心交橫聲切思紛紜歎慨訴同旅美人無相聞

風急訊灣浦裝高偃檣舳夕聽江上波遠極千里日寒
律警窮蹊爽氣起喬木隱隱日沒岫瑟瑟風發谷鳥還

五言古詩 卷二十一 七
暮林誼潮上冰結泐夜分霜下淒悲端出遙陸愁來攢
人懷羈心苦獨宿

久宦迷遠川川廣每多懼薄止閭邊亭關歷險程路靈
霽冥隅岫濛昧江上霧時涼籟爭吹流洑浪奔趣一作注

側焉增愁起搔首東南顧茫然荒野中舉目皆凜素回
風揚江泌寒棲動樹太息終晨漏企我歸颺遇

上潯陽還都道中作

昨夜宿南陵今日入蘆洲客行惜日月崩波不可留侵
星赴早路畢景逐前儔鱗鱗夕雲起獵獵晚一作曉風適
騰沙鬱黃霧翻浪揚白鷗登艫眺淮甸掩泣望荆流絕

目盡平原時見遠烟浮倏忽坐還合俄思甚兼秋未嘗
違戶庭安能千里遊誰令乏古節貽此越鄉憂

還都至三山望石頭城

泉源安首流川末澄遠波晨光被水族曉氣歇林阿兩
江皎平迴三山鬱駢羅南帆望越嶠北榜指齊河關肩
繞天邑襟帶抱尊華長城非壑嶮峻咀似荆芽攢樓貫
白日檣堞隱丹霞征夫喜觀國遊子遲見家流連入京
引躑躅望鄉歌彌前歎景促逾近勸路多偕萃猶如茲
弘易將謂何

行京口至竹里

高柯危且竦鋒石橫復仄複澗隱松聲重崖伏雲色水
閉寒方壯風動鳥傾翼斯志逢凋嚴孤遊值曛逼兼塗
無憇鞍半菽不遑食君子樹令名細人効命力不見長
河水清濁俱不息

行藥至城東橋

鷄鳴關吏起伐鼓早通晨嚴車臨迴陌延瞰歷城闔蔓
草緣高隅修楊夾廣津迅風首日發平路塞飛塵擾擾
遊宦子營營市井人懷金近從利撫劍遠辭親爭先萬
里塗各事百年身開芳及稚節含綵吝驚春尊賢永照
灼孤賤長隱淪容華坐銷歇端爲誰苦辛

奉迎大駕道路賦詩

傅亮

夙權發皇邑有人祖我舟錢離不以幣贈言重琳球知
止道攸貴懷祿義所尤四牡倦長路君轡可以收張邴
結晨軌踈董頓夕輶東隅誠已謝西景逝不留性命安
可圖懷此忤前修敷衽銘篤誨引帶佩嘉謀迷寵非予
志厚德良未酬撫躬愧疲朽三省慙爵浮重明照蓬艾
萬品同率由忠誥豈假知式微發直謳

臨川亭

荀雍

目極依春路披褐懷良辰明發戒徒御臨流餞歸人

登宣城郡

袁淑

五言古詩 卷二十一 十五
悵焉訊舊老茲前乃楚居十代闕州記百祀絕方書

京路夜發

齊謝朓

擾擾整夜裝肅肅戒徂兩曉星正寥落晨光復瀼瀼猶
沾餘露團稍見朝霞上故鄉邈已復山川修且廣文奏
方盈前懷人去心賞敕躬每跼踖瞻恩惟震蕩行矣倦
路長無由稅歸鞅

晚登三山還望京邑

灞浹望長安河陽視京縣白日麗飛甍參差皆可見餘
霞散成綺澄江靜如練喧一作鳥春洲雜英滿芳甸
去矣方滯淫懷哉罷歡宴佳期悵何許淚下如流霰有

情知望鄉誰能鬢不變

將發石頭上烽火樓

徘徊戀京邑躑躅躑曾阿陵高遲關近眺迴風雲多荆
吳阻山岫江海含瀾波歸飛無羽翼其如離別何
之宣城郡出新林浦向板橋

江路西南永歸流東北鶩天際識歸舟雲中辨江樹旅
思倦搖搖孤遊昔已屢旣歡懷祿情復協滄洲趣翬塵
自茲隔賞心於此遇雖無玄豹姿終隱南山霧

始之宣城郡

下帷闕章句高談媿名理疎散謝公卿蕭條依椽史簪

五言古詩 卷二十一
髮逢嘉惠教義承君子心迹苦未并憂歡將十祀幸沾
雲雨慶方轡參多士振鷺徒追飛羣龍難隸齒烹鮮止
貪競共治一作屬廉耻伊余昧損益何用祇千里解劍
北宮朝息駕南川涖寧希廣平詠聊慕華陰市棄置宛
洛遊多謝金門裏招招漾輕楫行行趨巖趾江海雖未
從山林於此始

宣城郡內登望

借問下車日匪直望舒圓寒城一以眺平楚正愴然山
積陵陽阻溪流春穀泉威紆距遙甸巉岳帶遠天切切
陰風暮桑柘起寒烟悵望心已極惆恍魂屢遷結髮倦

爲旅平生早事邊誰規鼎食盛寧要狐白鮮方棄汝南
諾言稅遠東田

後齋迴望

高軒瞰四野臨牖眺襟帶望山白雲裏望水平原外夏
木轉成帷秋荷漸如蓋輦洛常睠然搖心似懸旆

暫使下都夜發新林至京邑

贈西府同僚

大江流日夜客心悲未央徒念關山近終知返路長秋
河曙耿耿寒渚夜蒼蒼引領見京室宮雉正相望金波
麗鳩鵲玉繩低建章驅車鼎門外思見昭丘陽馳暉不
可接何況隔兩鄉風雲有鳥路江漢限無梁常恐鷹隼

擊時菊委嚴霜寄言爵羅者寥廓已高翔

八公山作

和王著作作融

二別阻漢坻雙嶠望河澳茲嶺復嶺分區莫淮服東
限瑯琊臺西距孟諸陸阡眠起雜樹檀欒陰修竹日隱
澗疑空雲聚岫如複出沒眺樓雉遠近送春日戎州昔
亂華素景淪伊穀帖危賴宗袞微管寄明牧長蛇固能
翦奔鯨自此曝道峻芳塵流業遙年運倏平生仰令圖
吁嗟命不淑浩蕩別親知連一作翻戒征軸再遠館娃
宮兩去河陽谷風烟四時犯霜雨朝夜沐春秀良已凋
秋塲庶能築

郊行

二首和何議曹

春心澹容與挾弋步中林朝光映紅萼微風吹好音江
垂得清賞山際果幽尋未嘗遠離別知此愜歸心流泝
終靡已嗟行方至今

江臯倦遊客薄暮懷歸者揚舲浮大川惆悵至日下霍
靡青莎被潺湲石溜瀉寄語持笙簧舒憂願自假歸途
豈難涉翻同江上夏

落日悵望

昧旦多紛喧日晏未遑舍落日餘清陰高枕東牕下寒
槐漸如束秋菊行當把借問此何時涼風懷朔馬已傷

五言古詩 卷二十一
慕歸客復思離居者情嗜幸非多案牘偏爲寡旣乏瑯
琊政方憇洛陽社

將遊湘水尋句溪

旣從陵陽釣挂鱗驂赤螭方尋桂水源謁帝蒼山垂辰
哉且未會乘景弄清漪瑟汨瀉長淀潺湲赴兩岐輕蘋
上靡靡襍石下離離寒草分花映戲鮪乘空移輿以暮
秋月清霜落素枝魚鳥余方翫纓綬君自縻及茲暢懷
抱山川長若斯

游東田

戚戚苦無悰携手共行樂尋雲陟累榭隨山望菌閣遠
樹曖阡阡生煙紛漠漠魚戲新荷動鳥散餘花落不對
芳春酒還望青山郭

北牕

和何從事

國小暇日多民淳紛務屏闢牖期清曠開簾候風景泱
泱日照溪團團雲去嶺岩堯蘭撩峻駢闐石路整池北
樹如浮竹外山猶影自來彌弦望及君臨箕頽清文蔚
且詠微言超已領不見城壕側思君朝夕頃廻舟方在
辰何以慰延頸

往敬亭路中聯句

山中芳杜綠江南蓮葉紫芳年不共遊淹留空若是

府君

綠水豐漣漪青山多繡綺新條日向抽落花紛已委從何

事弱蔓既青翠輕莎方霍靡鷺鷗沒而遊麕麕騰復倚

齊舉春岸望沈沈清流見瀾瀾幸藉人外遊盤桓未能

徒陳驚柀把瓊芳隨山訪靈詭榮楯每嶙峋林堂多碻

礪府君

還塗臨渚聯句

綠水纈清波青山繡芳質落景皎晚陰殘花綺餘日從何

事白沙澹無際青山眇如一傷此物運移惆悵望還律

吳白水田外明孤嶺松上出即趣佳可淹淹留非下秩

府君

上湘度琵琶磯

劉頊

茲山挺異嶸孤起秀雲中陵池激楚浪紛紜絕宛風烟

峯晦如晝寒水清若空頡頏鷗舞白流亂葉飛紅

日發青林

孔稚圭

孤征越清江遊子悲路長二旬倏已滿三千眇未央草

雜今古色巖留冬夏霜寄懷中山舊舉酒莫相忘

從頓暫還城

梁簡文帝

漢渚水初綠江南草復黃日照蒲心發一作風吹梅蕊

香征艫艤湯塹歸騎息金隍舞觀衣常裝歌臺絃未張

持此橫行去誰念守空牀

奉和

劉遵

漢水深難渡深潭見底清錦竿繫鳧舸珠竿懸翠旂鳴
笳芳樹曲流唱採蓮聲神遊不停駕日暮返連營寧顧
空房裡階下綠苔生

經琵琶峽

簡文帝

由來歷山川此地獨迴還百嶺相紆蔽千崖共隱天橫
峯時礙水斷岸或通川還瞻已迷向直去復疑前夕波
照孤月山枝歛夜烟此時愁緒密

魂九遷

入漱浦

泛水入迴塘空枝度日光竹垂懸掃浪鳧疑遠避檣

去丹陽尹荊州 二首

元帝

驟駕乘駟馬謁帝朝承明分符蒞閩越終然慙勵精
副君垂獎盼仁慈穆且敦終朝陪北閣清夜侍西園降
貴深知已寧思食榘恩未嘗辭晝室誰忍去輶轅

奉和

蕭琛

妙善有兼姿羣才成大厦奕奕工辭賦翩翩富文雅麗
藻若龍雕洪才類河瀉案牘時多暇優游閱典墳儒墨
自玄解文史更區分平臺禮申穆兔苑接卿雲軒蓋蔭
馳道珠履忽成羣德音高下被英聲遠近聞

奉和

徐勉

敬愛良是賢謙恭寔所務尊賢遺道德重學嚴師傅六
藝誠爲敏三雍稱有裕覆被唯仁義吐納必珪璋壯思
如泉湧逸藻似雲翔夙有匡時調早懷經世方留心在
庶績厲精思治綱

早發龍巢

一作劉真

元帝

征人喜放溜曉發晨陽隈初言前浦合定覺近洲開不
疑行舫動唯看遠樹來還瞻起漲岸稍隱陽雲臺

夜宿栢齋

獨暗行人靜簾開雲影入風細雨聲遲夜短更籌急能
下班姬淚復使倡樓泣況此客遊人中宵空佇立

赴荊州泊三江口

一作行經巴陵部伍

涉江望行旅金鉦間綵旂水際含天色虹光入浪浮柳
條恒拂岸花氣盡薰舟叢林多故社單戍有危樓疊鼓
隨朱鷺長簫應紫駟蓮舟夾羽斝畫舸覆緹油榜歌殊
未息於此泛安流

後臨荊州

擁旄去京縣褰帷辭未央弱冠復王役從容

張不

學胡威絹寧挂裴潛牀所冀方留犢行當息飲羊戲蝶
時飄粉風花乍落香高欄來蕙氣疎簾度晚光綺錢臨
仄宇阿閣繞長廊

登隄望水

驅馬河隄上非謂城隅遊懷山殊未已徒然勞九愁旅
泊依村樹江槎擁戍樓高岸翻成浦曲港反通舟棗野
良知歎瓠河今可儔願假宣尼道一作術泗水却橫流

出江陵縣還

二首

遊魚迎浪上雒雉向林飛遠村雲裏出遙船天際歸
朝出屠羊縣夕返仲宣樓水滿還侵岸沙盡稍開流

昧旦出新亭渚

徐勉

驅車凌早術山華映初日攬轡且徘徊復值清江謐杳
靄楓樹林參差黃鳥匹氣物宛如斯重以心期逸春堤

一遊衍終朝意殊悉

和徐都曹勉

齊謝朓

宛洛佳遨遊春色滿皇州結軫青郊路迴瞰蒼江流日
華川上動風光草際浮桃李成蹊徑桑榆蔭道周東都
已倣載言歸望綠疇

循役朱方道路

沈約

分繡出帝京升裝奉皇穆洞野屬滄溟聯郊遡河服日
映青丘島塵起邯鄲陸江移林岸微巖深烟岫複歲嚴
摧磴草午寒散嶠木榮蔚夕飈卷蹉跎晚雲伏霞志非
易從旌軀信難牧豈慕淄宮梧方辭兔園竹羈心亦何

五言古詩 卷二十一
言迷蹤庶能復

早發定山

夙齡愛遠壑晚蒞見竒山
標峯綵虹外置嶺白雲間
傾壁忽斜豎絕頂復孤圓
歸海流漫漫出浦水濺濺
野棠開未落山櫻發欲然
忘歸屬蘭杜懷祿寄芳荃
眷言採三秀徘徊望九仙

入新安江

江至清淺深見底貽京邑遊好

眷言訪舟客茲川信可珍
洞徹隨清淺皎鏡無冬春
千仞寫喬樹百丈見遊鱗
滄浪有時濁清濟涸無津
豈若乘斯去俯映石磷磷
紛吾隔蠶滓寧假濯衣巾
願以潺

浚水霑君纓上塵

泛永康江

長枝萌紫葉清源泛綠苔
山光浮水至春色犯寒來
臨睨信永矣望美暖悠哉
寄言幽閨妾羅袖勿空裁

登玄暢樓

危峯帶北阜高頂出南岑
中有陵風榭廻望川之陰
岸險每增減湍平互淺深
水流本三派臺高乃四臨
上有離羣客客有慕歸心
落暉映長浦渙景燭中罇
雲生嶺乍黑日下溪半陰
信美非吾土何事不抽簪

從征虜始安王道中

江淹

五言古詩 卷二十七
素笏從帷幕，仄身豫休明。君子未獲晏，小人亦自營。結
軒首涼野，驅馬憐寒城。容裔還鄉權，逶迤去國旌。山氣
亘百里，山色與雲平。喬松日夜竦，紅霞旦夕生。徒慙恩
厚，槩空抱春施。名仰願光威，遠歲晏返柴荆。

望荆山

奉義

一作詔

至江漢始知楚塞長，南關繞桐栢，西嶽出魯

陽寒郊無留影，秋日懸清光。悲風撓

繞

作重林雲霞肅

川漲歲晏，君如何零淚。霑衣裳，玉柱空掩露。金樽坐含
霜，一聞苦寒奏，再使艷歌傷。

步桐臺

客子畏霜雪，憂至竟悠哉。綺帷生網羅，寶刀積塵埃。思
君出漢北，鞍馬登楚臺。歲綵合雲光，平原秋色來。寂聽
積空意，凝望信長懷。蕙芬自有美，光景詎徘徊。山中忽
緩駕，暮雪將盈階。

遷陽亭

擘淚訪亭候，茲地乃閩城。萬古通漢使，千載連吳兵。瑤
礪負嶄翠，銅山鬱縱橫。方水埋金麓，圓岸伏丹瓊。下視
雄虹照，俯看綵霞明。桂枝空命折，烟氛坐自驚。劒逕羞
前檢，岷山慙舊名。伊我從霜露，僕御復孤征。楚客心命
絕，一願聞越聲。

赤亭渚

吳江泛丘墟饒桂復多楓水夕潮波黑日暮精氣紅路
長寒光盡鳥鳴秋草窮瑤水雖未合珠霜竊過中坐識
物序晏卧視歲陰空一傷千里極獨望淮海風遠心何
所類雲邊有征鴻

度泉嶠出諸山之頂

岑巖蔽日月左右信艱哉萬壑共馳驚百谷爭往來鷹
隼既厲翼蛟魚亦曝鰓崩壁迭枕臥嶄石屢盤迴伏波
未能鑿樓船不敢開百年積流水千歲生青苔行行詎
半景余馬以長懷南方天炎火魂兮可歸來

度西塞望江上諸山

南國多異山雜樹共冬榮潺湲夕澗急嘈嘈一作晨鷗
鳴石林上參錯流沫下縱橫松氣鑑青藹霞光鑠丹英
望古一疑思留滯桂枝情結友愛遠岳採藥好長生常
畏佳人晚秋蘭傷紫莖海外果可學歲暮誦仙經

渡黃河

范雲

河流迅且濁湯湯不可凌檜楫難為榜松舟纔自勝空
庭偃舊木荒疇餘故塍不覩人行跡但見狐兔興寄言
河上老此水何當澄

之零陵郡次新亭

五言古詩 卷二十七 二十六
江干遠樹浮天末孤烟起江天自如合烟樹還相似滄
流未可源高颿去何已

述行詩

振策出燕代驅車背朔并翩翩朱蓋轉蕭蕭良馬鳴

旦發漁浦潭

丘遲

漁潭霧未開赤亭風已颺權歌發中流鳴鞞響沓障一作

嶂村童忽相聚野老時一望詭怪石異象嶄絕峯殊狀

森森荒樹齊析析寒沙漲藤垂島易陟崖傾嶼難傍信
是永幽棲豈徒暫清曠坐嘯昔有委臥治今可尚

夜發密巖口

弭棹纔假寐擊汰已爭先敞朗朝霞澈驚明曉魄懸萬
尋仰危石百丈窺重泉叢枝上點點崩溜下填填

泛長溪

任昉

狗祿聚歸糧依隱謝羈勒絕物甘離羣長懷思去國長
溪永東舍震區窮水域道遇垂綸叟聊訪問津惑弭楫
申九言無爲累牽纏長泛滄浪水平明至曛黑

濟浙江

昧旦乘輕風江湖忽來往或與歸波送乍逐翻流上近
岸無暇目遠峯更興想綠樹懸宿根丹崖頽久壤

落日登高

王僧孺

五言古詩 卷二十七 二十一
憑高且一望目極不能捨東北指青門西南見白社軫軫河梁上紛紛渭橋下爭利亦爭名驅車復驅馬寧訪蓬蒿人誰憐寂寞者

中川長望

長川杳難卽四望四無極安流寧可值憤風方未息危帆渡中懸孤光巖下晃岸際樹難辨雲中鳥易識莫恨東復西誰知迂且直故鄉相思者當春愛顏色獨寫千行淚誰同萬里憶

初至壽春作

吳均

桓譚不賣交馮子任紆直浮漉逐波影飄揚恣風力北州少知舊南陽寡相識中駕每傾輪當騫復摧翼望美無津梁私自憐何極

奉使廬陵

悵然不自怡端憂坐漠漠風急鴈毛斷冰堅馬蹄落客子饑寒多江上衣裳薄何當報恩罷驅車還北郭

至湘洲望南嶽

重波淪且直連山糾復紛鳥飛不復見風聲猶可聞隴隴樹裏月飄飄水上雲長安遠如此無緣得報君

初發新林

何遜

伊昔負薪暇慕義游梁楚短翮忘連翮追飛散容與優

五言古詩 卷三十一
二十八
游沐道教漸漬淹寒暑大德本無酬輕生竊自許舟歸
屬海運風積如鵬舉浮水暗舟艫合岸喧徒侶凜凜窮
秋暮初寒入洲渚鏡吹響清江懸旗出長嶼危檣迥不
進杳浪高難拒回首泣親賓中天望宛許帝城猶隱約
家園無處所去矣方悠悠含意將何語

渡連圻二首

此山多靈異峻咀實非恒狀流自洄糾激瀨視奔騰懸
崖抱竒崛絕壁駕峻嶒磳磳上爭險崖崕下相崩百年
積死樹千尺掛寒藤詭怪終不測迴沈意難登願欲書
聞見聊以寄親朋

連圻連不極極望在雲霞絕壁無走獸窮岸有盤楂糾
紛上龍從穿豁下巖芽魚遊若擁劍猿掛似懸瓜陰崖
生駭蘚伏水拂澄沙客子行行倦年光處處華石蒲生
促節巖樹落高花暮潮還入浦夕鳥飛向家寓目皆鄉
思何時見狹斜

入東經諸暨縣下浙江作

疲身不自量溫腹無恒擬未能守封植何能固廉耻一
經可人言三冬徒戲爾虛信蒼蒼色未究冥冥理得彼
既宜然失之良有以常言厭四壁自覺輕千里日夕聊
望遠山川空信美歸飛天際沒雲霧江邊一作傍起安邑

五言古詩 卷二十七 二十九
乏主人臨邛多客子鄉鄉自風俗處處皆城市所見無
故人含意終何已

還渡五洲

我行朔已晦泝水復泐流戎傷初不辨動默自相求
言還九派迴艫出五洲蕭散烟霧晚淒清江漢秋沙汀
暮寂寂蘆岸晚脩脩以此南浦夜重此北門愁方圓既
齟齬貧賤豈怨尤

宿南洲浦

幽棲多暇豫從役知辛苦解纜及朝風落帆依暝浦違
鄉已信次江月初三五沈沈夜看流淵淵朝聽鼓霜洲
渡旅鴈朔颺吹宿莽夜淚坐淫淫是夕偏懷土

下方山

寒鳥樹間響落星川際浮繁霜白曉岸苦霧黑晨流鱗
鱗逆去水瀾瀾急還舟望鄉行復立瞻途近更脩誰能
百里地縈繞千端愁

曉發

早霞麗初日清風消薄霧水底見行雲天邊看遠樹且
望泐泐劇暫有江山趣疾兔聊復起爽地豈能賦

日夕出富陽浦口

和朗公

客心愁日暮徙倚空望歸山烟涵樹色江水映霞暉獨

鶴凌空一作風逝雙鳧出浪飛故鄉千餘里茲夕寒無衣

慈姥磯

暮烟起遙岸斜日照安流一同心賞夕暫解去鄉憂野岸平沙合連山遠霧浮客悲不自己江上望歸舟

入西塞

示南府同僚

露清曉風冷天曙江晃一作光爽薄雲巖際出初月波中

上黯黯連嶂陰騷騷急沫響迴楂急礙浪羣飛爭戲廣伊余本羈客重睽復心賞望鄉雖一路懷歸成二想在昔愛名山自知歡獨往情游乃落魄得性隨怡養年事以蹉跎生平任浩蕩方還讓夷路誰知羨魚網

往晉陵聯句

臨別我傷悲送歸子自適劉金不可散上蓋何由惜從來重分陰未曾輕尺璧故人情一異於是望二益爾自高樓寢予返東臯陌寄語落毛人非復平原客遜問舍且求田音辭無可擇勝門成好事盤紆欲何索爽

至大雷聯句

高談會良夕滿酒對羈情閃閃風烟動蕭蕭江雨聲遜密雲窮浦暗飛電遠洲明若非今宴適詎使客愁輕劉孺遙舟似連鴈遠火若迴星江潭望如此銜卮共君傾桓季

珪

落日郡西齋望海山

蕭子雲

漁舟暮出浦漢女採蓮歸夕雲向山合一作浦歛水鳥望田
飛蟬鳴早秋至蕙草無芳菲故隱天山北夢想日依依

早出巡行矚望山海

王筠

王生臨廣隰潘子望洪河同軫懷歸思俱興年逝歌曰
余異二子承睫淚滂沱剖符瀛海外結綬層山阿因心
留惻憫怨已息煩苛繕築循時隙興動藉民和高門惟
壯麗修雉亦駢羅層樓亦攀陟復道亦經過昧旦清音
上風氣入織蘿雲起垂天翼水動連山波奔濤延瀾汗
積翠遠差峩鄉關屢迴曲還顧杳蹉跎曾微肅肅羽望

路空如何

春夕早泊

一云太子泫落日望水

劉孝綽

川平落日迴落照滿川漲復此一作淪波地派別引沮
漳耿耿流長脉熠熠動微光寒鳥逐查漾饑鶉拂浪翔
臨泛一作自多美况乃此還故鄉榜人夜理檝權女
閨成粧欲待春江曙爭塗向洛陽

和劉詒議孝綽

何遜

旅人嗟倦遊結纜坐春洲日暮江風靜中川聞棹謳草
光天際合霞影水中浮單艫時向浦獨檝乍乘流變童
泣垂釣妖姬哭盪舟客心自有緒對此空復愁

還渡浙江

劉孝綽

季秋弦望後輕寒朝夕殊商人泣紈扇客子夢羅襦憂
來自難遣况復阻川隅日暮愁陰合繞樹噪寒鳥濛漠
江烟上蒼茫沙嶼蕪解纜辭東越接軸驚西徂懸帆似
馳驥飛棹若驚鳧言歸遊俠窟方從冠蓋衢

夕逗繁昌浦

日入江風靜安波似未流岸迴知舳轉解纜覺船浮暮
烟生遠渚夕鳥赴前洲隔山聞戍鼓傍浦喧棹謳疑是
辰陽宿於此逗孤舟
月半夜泊鵲尾

客行三五夜息棹隱中洲月光隨浪動山影逐波流

發建興渚

示到陸二黃門一作吳均

扁舟去平樂還顧極川梁猶聞棗下吹尚識杏間堂洛
橋分曲渚官寺隱回塘客行裁跬步卽事已多傷况復
千餘里悲心未遽央

帆渡吉陽洲

劉孝儀

揚帆乘浪華捺鼓要風力近樹儵而遐遙山俄已逼欲
比驚龍掣將頓陽鳥翼客行悲道遠唯須前路極

前題

劉孝威

江風一作潮凌曉急鉦鼓候晨催幸息榜人唱聊望高帆

五言古詩 卷二十一 三十三
開聯村倏忽盡循汀俄頃回疑是傍洲退似覺前山來
將與圖南競誰云勞沂泗

出新林

芒山眊洛邑函谷望秦京遙分承露掌遠見長安城故
鄉已可識遊子必勞情霧罷前林見一作曠風息涌川平
坐觀暮潮落漸見夕烟生無由一羽化徒想御風輕

自江州還入石頭

劉峻

鼓枻浮大川延睇洛城觀洛城何鬱鬱杳與雲霄半前
望蒼龍門斜瞻白鶴館槐垂御溝道柳綴金隄岸迅馬
晨風趨輕輿流水散高歌一作唱梁塵下絙瑟荆禽亂我

思江海遊曾無朝市玩忽寄靈臺宿空軫及關歎仲子
入南楚伯鸞出東漢何能棲樹枝取斃王孫彈

發新林浦

贈同省

劉顯

回首望歸途山川邈離異落日懸秋浦歸鳥飛相次感
物傷我情惆悵懷親懿

江行

江洪

日沒風光靜遠山清無雲潮落晚洲出浪罷沙成文挾
琴上高岸望月彈明君去家未千里斷絕怨離羣

夜泊巴陵

朱超道

月夜三江靜雲霧四邊收淤泥不通挽寒浦劣容舟廻

風折長草輕冰斷細流古村空列樹荒戍久無樓

罷故章縣

陳陰鏗

秩滿三秋暮舟虛一水濱漫漫遵歸道淒淒對別津晨
風下散葉岐路起飛塵長岑舊知遠萊蕪本自貧被裏
恒容吏正朝不繫民惟當有一犢留持贈後人

和傅郎歲暮還湘洲

蒼茫歲欲晚辛苦客方行大江靜猶浪扁舟獨且征棠
枯絳葉盡蘆凍白花輕戍人寒不望沙禽迴未驚湘波
各深淺空軫念歸情

晚出新亭

大江一浩蕩離悲足幾重潮落猶如蓋雲昏不作峯遠
戍唯聞鼓寒山但見松九十方稱半歸途詎有蹤

晚泊五洲

客行逢日暮結纜晚洲中戍樓因岷一作險村路入江
窮水隨雲度黑山帶日歸紅遙憐一柱觀欲輕千里風
和侯司空登樓望鄉

懷土臨霞觀思歸想石門瞻雲望鳥道對柳憶家園寒
田穫裏靜野日燒中昏信美今何益傷心自有源

度岸橋

畫橋長且曲傍險復憑流寫虹晴尚飲圖星晝不收跨

五言古詩 卷二十七 三十五
波連斷岸接路上危樓欄高荷不及池清影自浮何必
橫南渡方復似牽牛

登武昌岸望

遊人試歷覽舊跡已丘墟巴水縈非字楚山斷類書荒
城高初落古柳細條疎烟蕪遂若此當不爲能居

五洲夜發

夜江霧裏潤新月迴中明溜船惟識火驚鳧但聽聲勞
者時歌榜愁人數問更

長安還至方山愴然自傷

沈炯

秦軍坑趙卒遂有一人生雖還舊鄉里危心曾未平淮

源比桐栢方山似削成猶疑屯虜騎尚畏值胡兵空村
餘拱木廢邑有頽城舊識旣已盡新知皆異名百年三
萬日處處此傷情

入武關

一作周弘直

周弘正

武關設地險遊客好迴迴將軍天上落童子棄繻來揮
汗成雲雨車馬颺塵埃鷄鳴不可信未曉莫先開

秋日登廣州城

江總

秋城韻晚笛危榭引清一作風遠氣疑埋劒驚禽似避

弓海樹一邊出山雲四面通野火初烟細新月半輪空
塞外離羣客顏鬢早如蓬徒懷建鄴水復想洛陽宮不

及孤飛鴈獨在上林中

并州羊腸坂

三春別帝鄉五月度羊腸本畏車輪折翻嗟馬骨傷驚
風起朔鴈落照盡胡桑關山定何許徒御慘悲涼

被使出關

一作庾肩吾

何胥

出關登隴坂迴首望秦川絳水通西晉機橋指北燕奔
流下激石古木上參天鶯啼落春後鴈度在秋前平生
屢此別腸斷自催年

從駕幸金墉城

北魏温子昇

茲城實佳麗飛薨自相並膠葛擁行風岌峩闕流景御

溝屬清洛馳道通丹屏湛淡水成文參差樹交影長門
久已閉離宮一何靜細草綠玉階高枝陰桐井微微夕
渚暗肅肅暮風冷神行揚翠旗天臨肅清警伊臣從下
列逢恩信多幸康衢雖已泰弱力將安騁

從周入齊夜度砥柱

一作梁惠慕道士詩題云犯虜將逃作

北齊顏之推

俠客重艱辛夜出小平津馬色迷關吏雞鳴起戍人露
鮮華劒彩月照寶刀新問我將何去北海就孫賓

至渭源

周滕王道

渭源奔禹穴輕瀾起客亭淺淺滿澗響蕩蕩竟川鳴潘

生稱運石馮子聽波聲斜去臨天半橫來對始平合流
應不雜方知性本清

登渭橋

宗羈

仲山朝飲馬還坐渭橋中南瞻臨別館北望盡離宮四
面衣裾合三條冠蓋通蘭香想和季雲起憶成公圯上
相知早鷄鳴幸共同

奉和趙王途中五韻

一作使信

王褒

飄飄映車幕出沒望連旗度雲還翊陣迴風卽送師峽
路沙如月山峯石似眉村桃拂紅粉岸柳被青絲錦城
遙可望迴鞍念此時

渡河北

一作范雲

秋風吹木葉還似洞庭波常山臨代郡亭障繞黃河心
悲異方樂腸斷隴頭歌薄暮臨征馬失道北山阿

始發宿亭

送人亭上別被馬櫪中嘶漠漠村烟起離離嶺樹齊落
星侵曉沒殘月半山低

將命至鄴

庾信

大國修聘禮親鄰自此敦張旻事原隰負辰報成言西
過犯風露北指度輶轅交歡值公子展禮覲王孫何以
譽嘉樹徒欣賦采繫四牢盈折俎三獻滿壘樽人臣無

五言古詩 卷二十七 三十八
境外何由欣此言風俗既殊阻山河不復論無因旅南
館空欲祭西門眷然惟此別風期幸共存

入彭城館

襄君前建國項氏昔稜威鴟飛傷楚戰鷄鳴悲漢圍年
一作代殊氓俗風雲更盛衰水流浮磬動山喧雙翟飛
夏餘花欲盡秋近鷺將稀槐庭垂綠穗蓮浦落紅衣徒
知日云暮不見舞雩歸

同州還

赤岸繞新村青城臨綺門范睢新入相穰侯始出蕃上
林催獵響河橋爭渡喧竄雉飛橫澗藏狐入斷原將軍

高宴晚來過青竹園

將命使北始渡瓜步江

校尉始辭國樓船欲渡河輜軒臨磧岸旌節映江沱觀
濤想帷蓋爭長憶干戈雖同燕市泣猶聽趙津歌

反命河朔始入武州

輕車初逐李定遠未隨班受詔祈連返申威疎勒還飛
蓬損腰帶秋鬢落容顏寄言舊相識知余生入關

歲晚出橫門

年華改歲陰遊客喜登臨據鞍垂玉帖橫腰帶錦心未
弱浮橋沒沙虛馬跡深倚弓依石岸回牀向柳陰智瓊

五言古詩 卷二十一 三十九
來勸酒文君過聽琴明朝雲雨散何處更相尋

和劉儀同臻登廣陵岸

南登廣陵岸迴首落星城不言臨舊浦烽火照江明

望渭水

樹似新亭岸沙如龍尾灣猶言吟暝浦應有落帆還

臨渭源

隋煬帝

西征乃屆此山路亦悠悠地幹紀靈異同穴吐洪流濫
觴何足擬浮槎難可儔驚波鳴澗石澄岸瀉巖樓滔滔
下狄縣森森肆神州長林嘯白虎雲徑想青牛風歸花
葉散日舉烟霧收直爲求民隱非窮轍迹遊

奉和

薛道衡

玄功復禹迹至德去湯羅玉關亭障遠金方水石多八
川茲一態萬里導長波驚流注陸海激浪象天河鸞旗
歷巖谷龍穴暫經過西老陪遊宴南風起詠歌庶品蒙
仁澤生靈穆太和微臣惜暮景願駐魯陽戈

奉和

柳詒

飲馬投錢岸解釣剖璜津風絲曳香餌覆杯懷昔人

出潁至淮

一云早渡淮

煬帝

平淮旣森森曉霧復霏霏淮甸未分色泱泱共晨暉晴
霞轉孤嶼錦帆出長圻潮魚時躍浪沙禽鳴欲飛會待

五言古詩 卷二十一 四十一
高秋晚愁因逝水歸

奉和

諸葛穎

涉潁倦紆迴浮淮欣迥直遙村舍水氣遠浦澄天色靈
濤稍欲近仙巖行可識玄覽屬睿辭風雲有餘力

奉和

蔡允恭

久倦川塗曲忽此望淮圻波長泛淼淼眺迴情依稀
覺金烏轉漸見錦颿稀欲知仁化洽謳歌滿路歸

奉和

弘執恭

虛情欣逸賞臨泛入淮淝棹聲喧岸度颿影出雲飛清
流含日彩犇浪蕩霞暉還如漳水曲鳴笳啓路歸

奉和

虞世南

良晨喜利涉解纜入淮潯寒流泛鷁首霜吹響哀吟潛
鱗波裏躍水鳥浪前沈邗溝非復遠悵望悅宸襟

夏日臨江

煬帝

夏潭陰修竹高岸坐長楓日落滄江靜雲散遠山空鷺
飛林外白蓮開水上紅逍遙有餘興悵望情不終

奉和 二首

柳詵

詰日金鏡發驟駕出城闈鮮雲臨葆蓋細草藉班輪千
里烟霞色四望江山春梅風吹落蘂酒雨減輕塵日斜
歡未畢睿想良非一風生疊浪起霧卷孤帆出揆藻麗

繁星高論光朝日空美鄒枚侶一作舉終謝淵雲筆

大江都會所長洲有舊名西流控岷蜀東汎邇蓬瀛未

覩織羅動先聽遠濤聲空濛雲色晦泱疊浪華生欲知

暮雨歇當觀飛旆輕

幸江都作

煬帝

求歸不得去真成遭箇春鳥聲爭勸酒梅花笑殺人

奉和一作虞茂

虞世基

巡遊光帝典征吉乃先天澤國翔宸駕水府泛樓船七

萃縈長薄三翼亘通川夙興大昕始求衣昧旦前澄瀾

浮曉色遙林卷宿烟晨霞稍含景落日漸虧弦廻塘響

歌吹極浦望旌旃方陪覲東后登封禪肅然

奉和一作虞世基

虞世南

南國行周化稽山秘夏圖百王豈殊軌千載協前謨肆

覲遵時豫順動悅來蘇安流進玉舳一作畫舸戒道翼金吾

龍旂煥辰象鳳吹溢川塗封唐昔敷錫分陝被荆吳沐

道咸知讓慕義久成都冬律初飛管陽鳥正銜蘆嚴飈

肅林薄暖景澹江湖鴻私浹幽遠厚澤潤凋枯虞琴起

歌詠漢筑動巴歛多幸霑行葦無庸類散樗

還京師

煬帝

東都禮儀舉西京冠蓋歸是月春之季花柳相依雲

蹕清馳道雕輦御晨暉嘹亮鏡笳奏歲蕤旌旆飛後乘
趨文雅前驅厲武威

奉和

李德林

至仁文教遠惟聖武功宣太師觀六義諸侯問百年玄
覽時乘隙訓旅次山川鎮象屯休氣華蓋翼飛烟鼓奏
千人響旗動七星連峻嶺戈迴日高峯馬照一作天姑
射神遊罷蕭關獵騎旋更待東山上看君巡狩篇

奉和

許善心

重光闡帝圖肆覲荷來蘇卜洛連新邑因秦還舊都雷
警三辰衛星陳七萃驅從風折鳳羽曜日拖魚鬚憲章
殫禮樂容服備車徒迴鑿入鄴鎬從蹕度枌榆冉冉年
和變遲遲節物徂餘花照玉李細葉翦珪梧朝夕萬國
湊海會百川輸微生逢大造倏忽改榮枯

從駕巡遊

一作許善心

李德林

大夏堯遺俗汾河漢豫遊今隨龍駕往還屬鴈飛秋天
行肅輦路日馭翼華輶朝乘六氣辨夕動七星旒谷靜
禽多思風高松易秋遠林才有色遙水漫無流京華佳
麗所目極與雲浮但覩凌霄觀詎見望仙樓鎖門皆秀
發鴛池盡學優待君草封禪東山觀射牛

從駕幸晉陽

薛道衡

省方遵往冊遊豫叶前經金吾朝戒道校尉晚巡營重
巒下飛騎絕浦渡連旌澗水寒逾咽松風遠更清方觀
翠華反簪筆上云亭

入郴江

仗節遵嚴會揚舲沂急流征塗非白馬水勢類黃牛跳
波鳴石磧濺沫擁沙洲岸迴槎倒轉灘長船却浮緣崖
頻斷挽挂壁屢移鈎還憶青絲騎東方來上頭

夜作巫山

崔仲方

荆門秋水急巫峽斷雲輕若爲教月夜長短聽猿聲

初渡江

虞世基

歛策暫迴首掩涕望江濱無復東南氣空隨西北雲

汴水早發

應令

夏山朝萬國軒庭會百神成功疇與讓盛德今爲隣區
宇屬平一庶類仰陶鈞鑿蹕臨河濟裘冕肅柴裡啓行
分七萃備物象三辰祈祈亘原隰濟濟咸縉紳陽谷升
朝景青丘發早春袞衣敷帝則分器敘彝倫臨淄成誦
美河間雅樂陳薰風穆已被茂實久愈新

奉和幸太原輦上作

應詔

虞茂

唐巡光帝則夏務穆宸儀珠旗揚翼鳳玉獸儼丹螭流
吹和春鳥交弄拂花枝

五言古詩 卷二十一
奉和至壽春

應令

虞世南

瑤山盛風樂南巡務逸遊何如事巡撫民瘼諒斯求文
鶴揚輕蓋蒼龍飾桂舟汎沫縈沙嶼寒澌擁急流路指
八仙館途經百尺樓眷言昔遊踐迴駕且淹留後車喧
鳳吹前旌映綵旒龍驟駐六馬飛閣上三休調諧金石
奏歡洽羽觴浮天文徒可仰何以廁琳球

追從鸞輿夕頓戲下

應令

重輪依紫極前耀奉丹霄天經戀宸扈帝命扈仙鑣乘
星開鶴禁帶月下虹橋銀書含曉色金輅轉晨飈霧徹
軒營近塵暗斗城遙蓮花分秀學竹箭下驚潮撫已慙

龍榦承恩集鳳條瑤山盛風樂抽簡薦徒謠

初發東都

應詔

庾自直

二龍承玉軸萬騎翊林塘縱觀此何事巡駕幸淮揚伊
雒山川轉江河道長照日秋原淨分花曲水香稻梁
叨歲月羽翮仰恩光後塵歸舊里還如仙鶴翔

和張丞奉詔於江都望京口

孫萬壽

回首觀濤處極望滄海湄流波去無限喬木不勝悲蓬
萊雖已變池塘尚所思歸飛路窮此悵望情難持吾生
乃民季疇日佐藩維尚想西園夕猶懷北固時城邑纔
辨處風烟忽何之跂予未能已顧歎空遲遲

五言古詩 卷二十七
早發揚州還望鄉邑

鄉關不再見，悵望窮此晨。
山烟蔽鍾阜，水霧隱江津。
洲渚歛寒色，杜若變芳春。
無復歸飛羽，空悲沙塞塵。

東歸在路率爾成詠

學宦兩無成，歸心自不平。
故鄉尚千里，山秋猿夜鳴。
人愁慘雲色，客意慣風聲。
羈恨雖多緒，俱是一傷情。

行經太華

孔德紹

紛吾世網暇，靈岳展幽尋。
寥廓風塵遠，杳冥川谷深。
山昏五里霧，日落二華陰。
疎峯起蓮葉，危塞隱桃林。
何必東都外，此處可抽簪。

夜宿荒村

綿綿夕漏深，客恨轉傷心。
撫絃無人聽，對酒時獨斟。
故鄉萬里絕，窮愁百慮侵。
秋草思邊馬，遶枝驚夜禽。
風度谷餘響，月斜山半陰。
勞歌欲敘意，終是白頭吟。

王澤嶺遭洪水

地籟風聲急，天津雲色愁。
悠然萬頃滿，俄爾百川浮。
還似金堤溢，翻如碧海流。
驚濤遙起鷺，迴岸不分牛。
木梗誠無託，蘆灰豈暇求。
徒知懷趙景，終是倦陽侯。
思得乘槎便，蕭然河漢遊。

入蜀秋夜宿江渚

陳子良

我行逢日暮，弭棹獨維舟。水霧一邊起，風林兩岸秋。山陰黑斷磧，月影素寒流。故鄉千萬里，外何以慰羈愁。

和洗掾登城南坂望京邑

袁朗

二華連陌塞，九隴統金方。與區稱富貴，重險擅雄強。龍飛灞水上，鳳集岐山陽。神臯多瑞跡，列代有興王。我后膺靈命，爰求宅茲土。宸居法太微，建國資天府。玄風隔黎庶，德澤浸區宇。醒醉各相扶，謳歌從聖主。南登少陵岸，還望帝城中。帝城何鬱鬱，佳氣迺葱葱。金鳳凌綺觀，璇題敞蘭宮。複道東西合，衢南北通。萬國朝前殿，羣公議宣室。鳴珮舍早風，華蟬曜朝日。柏梁宴初罷，千鍾歡未畢。端拱肅巖廊，思賢聽琴瑟。逶迤萬雉列，隱軫千閭布。飛薨夾御溝，曲臺臨上路。處處歌鍾鳴，喧闐車馬度。日落長楸間，含情兩相顧。是月冬之季，陰寒晝不開。驚風四面集，飛雪千里迴。狐白登廊廟，牛衣出草萊。詎知韓長孺，無復重然灰。

宿郊外曉作

王衡

殘星落簷外，餘月罷窻東。水白先分色，霞暗未成紅。

奉和重適陽關

李那

銜悲向玉關，垂淚上瑤臺。舞閣懸新網，歌梁積故埃。紫庭生綠草，丹墀染碧苔。金扉晝常掩，珠簾夜暗開。方池

五言古詩 卷二十一
四十一
舍水思芳樹結風哀行雨歸將絕朝雲去不迴獨有西陵上松聲薄暮來

和入京

呂讓

俘囚經萬里憔悴度三春髮改河陽鬢衣餘京洛塵鍾儀悲去楚隨會泣留秦既謝平吳利終成失路人

詩所第二十八卷

五言古詩

癸卯歲始春懷古田舍

二首

晉陶淵明

在昔聞南畝當年竟未踐屢空既有人春興豈自免夙晨裝吾駕啓塗情已緬烏弄權新節冷風送餘善寒竹被荒蹊地爲罕人遠是以植杖翁悠然不復返卽理愧通識所保詎乃淺

先師有遺訓憂道不憂貧瞻望邈難逮轉欲志

一作常志

勤秉耒權時務解顏勸農人平疇交遠風良苗亦懷新雖未量歲功卽事多所欣耕種有時息行者無問津日入相與歸壺漿勞近鄰長吟掩柴門聊爲隴畝民

歸田園居

五首

少無適俗韻性本愛丘山誤落塵網中一去三十年羈
鳥戀舊林池魚思故淵開荒南野際守拙歸園田方宅
十餘畝草屋八九間榆柳蔭後園桃李羅堂前曖曖遠
人村依依墟里煙狗吠深巷中鷄鳴桑樹顛戶庭無塵
雜虛室有餘閒久在樊籠裏復得返自然

野外罕人事窮巷寡輪鞅白日掩荆扉虛室絕塵想時
復墟曲中披草共來往相見無雜言但道桑麻長桑麻
日已長我土日已廣常恐霜霰至零落同草莽

種豆南山下草盛豆苗稀晨興理荒穢帶月荷鋤歸道
狹草木長夕露沾我衣衣沾不足惜但使願無違

久去山澤游浪莽林野娛試携子姪輩披榛步荒墟徘徊
徇丘壟間依依昔人居井竈有遺處桑竹殘朽株借問
採薪者此人皆焉如薪者向我言死沒無復餘一世異
朝市此語真不虛人生似幻化終當歸空無

悵恨獨策還崎嶇歷榛曲山澗清且淺遇以濯吾足漉
我新熟酒隻鷄招近局一作屬日入室中聞荆薪代明燭
權來苦夕短已復至天旭

還舊居

疇昔家上京六載去還歸今日始復來惻愴多所悲阡

五言古詩 卷二十八
陌不移舊邑屋或時非履歷周故居隣老罕復遺步步
尋往跡有處特依依流幻百年中寒暑日相推常恐大
氣力不及衰撥置且莫念一觴聊可揮

移居 二首

青欲居南村非爲卜其宅聞多素心人樂與數晨夕懷
此頗有年今日從茲役弊廬何必廣取足蔽牀席鄰曲
時時來抗言談在昔奇文共欣賞疑義相與析
春秋多佳日登高賦新詩過門更相呼有酒斟酌之農
務各自歸閒暇輒相思相思則披衣言笑無厭時此理
將不勝無爲忽去茲衣食當須紀力耕不吾欺

和劉柴桑歸田

山澤久見招胡事乃躊躇直爲親舊故未忍言索居良
辰入奇懷挈杖還西廬荒塗無歸人時時見廢墟茅茨
已就治新疇復應畬谷風轉淒薄春醪解饑劬弱女雖
非男慰情良勝無栖栖世中事歲月共相疎耕織稱其
用過此奚所須去去百年外身名同翳如

和郭主簿田居 二首

藹藹堂前林中夏貯清陰凱風因時來回飈開一作吹我
襟息交游閒業臥起弄書琴園蔬有餘滋舊穀猶儲今
管已良有極過足非所欽春秋作美酒酒熟吾自斟弱

子戲我側學語未成音此事真復樂聊用忘華簪遙遙望白雲懷古一何深

和澤周三春清涼素秋節露凝無游氛天高肅景澈陵岑聳逸峰遙瞻皆奇絕芳菊開林耀青松冠巖列懷此貞秀姿卓爲霜下傑銜觴念幽人千載撫爾訣檢素不獲展厭厭竟良月

北宅祕園

宋謝莊

夕天霽晚氣輕霞澄暮陰微風清幽幌餘日照青林收光漸牕歇窮園自荒深綠池翻素景秋槐響寒音伊人儻同愛絃酒共棲尋

憶山中

謝靈運

采菱調易急江南歌不緩楚人心昔絕越客腸今斷斷絕雖殊念俱爲歸慮歛存鄉爾思積憶山我憤懣追尋棲息時偃臥任縱誕得性非外求自己爲誰纂不怨秋夕長常一作苦夏日短濯流激浮湍息陰倚密竿懷故叵新歡含悲忘春暖悽悽明月吹惻惻廣陵散殷勤訴危柱慷慨命促管

還舊園作

呈顏范二中書

辭滿豈多秩謝病不待年偶與張邴合久欲還東山聖靈昔迴眷微尚不及宣何意衝飈激烈火縱炎烟焚玉

發崑峯餘燎遂見遷投沙理既迫如叩願亦愆長與歡
愛別永絕平生緣浮舟千仞壑總轡萬尋巔流沫不足
險石林豈爲艱閩中安可處日夜念歸旋事蹟兩如直
心愜三避賢託身青雲上棲巖挹飛泉盛明盪氛昏貞
休康屯遭殊方感成貸微物豫采甄感深操不固質弱
易扳纏曾是反昔園語往實欵然曩基卽先築故池不
更穿果木有舊行壤石無遠延雖非休憇地聊取永日
閒衛生自有經息陰謝所牽夫子照清素探懷授往篇

和謝監靈運

顏延之

弱植慕端操窘步懼先迷寡立非擇方刻意藉窮棲伊

昔邁多幸秉筆侍兩闈

一作闈

雖慙丹艧施未謂玄素朕

徒遭良時詖王道奄昏霾人神幽明絕朋好雲雨乖弔
屈汀洲浦謁帝蒼山蹊倚巖聽緒風攀林結留莢跂予
間衡嶠曷月瞻秦稽皇聖昭天德豐澤振沈泥惜無雀
雉化何用充海淮去國還故里幽門樹蓬藜采茨葺昔
宇翦棘開舊畦物謝時旣晏年往志不偕親仁敷情昵
興玩一作賦究辭悽芬馥歇蘭若清越奪琳珪盡言非報
章聊用布所懷

石門新營所住四面高山迴溪石瀨茂林修竹

謝靈運

躋險築幽居披雲臥石門苔滑誰能步葛弱豈可捫
 嫋秋風過萋萋春草繁美人遊不還佳期何由敦芳塵
 凝瑤席清醕滿金尊洞庭空波瀾桂枝徒攀翻結念屬
 霄漢孤景莫與諉俯濯石下潭仰看條上猿早聞夕飈
 急晚見朝日暎崖傾光難留林深響易奔感往慮有復
 理來情無存庶持乘日車一作用得以慰營魂匪為眾人
 說冀與智者論

臨川王服竟還田里

鮑照

送舊禮有終事君慙懦薄稅駕罷朝衣歸志願巢壑尋
 思邈無報退命愧天爵捨耨將十齡還得守場藿道經
 盈竹筍農書滿塵閣愴愴秋風生戚戚寒緯作豐霧粲
 草華高月麗雲嶠屏跡勤躬稼衰疾倚芝藥顧此謝人
 羣豈直止商洛

夢歸鄉

銜淚出郭門撫劍無人達沙風暗空一作塞起離心眷鄉

畿夜分就孤枕夢想暫言歸孀婦當戶歎縑絲一作搔首復

鳴機慊欵論久別相將還綺闈歷歷簷下涼朧朧帳裏

暉刈蘭爭芬芳採菊競歲蕤開奩奪香蘇探袖解纓微

夢中長路近覺後大江違驚起空歎息恍惚神魂飛白

水漫浩浩高山壯巍巍波瀾異往復風霜改榮衰此土

非吾土慷慨當告誰

山園秋散

負疾固無豫晨衿悵已單氣交蓬門疎風數園草殘荒
墟半晚色幽庭憐夕寒既悲月戶清復切夜蟲酸流枕
商聲苦騷殺年志蘭臨歌不知調發與誰與歡儻結絃
上情豈孤林下彈

行宅

序曰余稟性端疎屬愛間外往歲羈役浙東
備歷江山之美名都勝境極盡登臨山原石
道步步新情廻池絕澗往往舊
識以吟以咏聊用述心齊竟陵王子良

訪宇北山阿卜居西野外幼賞悅禽魚早性羨蓬艾

春日家園

王儉

徙倚未云暮陽光忽已收羲和無停晷壯士豈淹留

冉一作苒老將至功名竟不修稷契匡虞夏伊呂翼商周

撫躬謝先哲解紱歸山丘

移病還園

示親屬

謝朓

疲策倦人世歛性就幽蓬停琴佇涼月滅燭聽歸鴻涼
薰乘暮晰秋華臨夜空葉低知露密崖斷識雲重折荷
葺寒袂開鏡眇衰容海暮騰清氣河關祕棲沖煙衡時
未歇芝蘭去相從

治宅

結宇夕陰街荒幽橫九曲迢遞南川陽迤邐西山足闢

五言古詩 卷二十八
館臨秋風敞牕望寒旭風碎池中荷霜翦江南菜旣無
東都金且稅東臯粟

山園

沈約

寒瓜方臥壠秋菰亦滿陂紫茄紛爛熳綠芋鬱參差初
菘向堪把時韭日離離高梨有繁實何減萬年枝荒渠
集野鴈安用昆明池

和沈祭酒約

齊謝朓

清淮左長薄荒徑隱高蓬回潮旦夕上寒渠左右通霜
畦紛綺錯秋町鬱蒙茸環梨縣已紫珠榴折且紅君有
棲心地伊我歡旣同何用甘泉側玉樹望青葱

秋晨羈怨望海思歸

沈約

分空臨澗霧披遠望滄流八桂曖如畫三桑眇若浮烟
極希丹水月遠望青丘

酬孔通直過懷蓬居

閭闔旣洞啓龍樓亦高闕兩宮集鸞步二闈引通籍伊
爾事清途紛吾供賤役

東園

陳王鬪鷄道安仁採樵路東郊豈異昔聊可閒余步野
徑旣盤紆荒阡亦交互槿籬疎復密荆扉新且故樹頂
鳴風颺草根積霜露驚麇去不息征鳥時相顧茅棟嘯

五言古詩 卷二十八
愁鴟平岡走寒兔夕陰帶層阜長烟引輕素飛光忽我
適豈止歲云暮若蒙西山藥頽齡倘能度

秋至懷歸

江淹

悵然集漢北還望岨山田汙汙百重壑參差萬里山楚
關帶秦隴荆雲冠吳煙草色歛窮水木葉變長川秋至
帝子降客人傷嬋娟試訪淮海使歸路成數千蓬驅未
止極旌心徒自懸若華想無慰憂至定傷年

還故園

漢臣泣長沙楚客悲辰陽古念雖不舉茲理亦宜傷山
中信寂寥孤景吟空堂北地三變露南簷再逢霜竊值
寰海闢仄見圭緯昌浮雲抱山川遊子御故鄉遽發桃
花渚適宿春風場紅草涵電色綠樹鑠煙光高歌僚關
國微歎依筮篁請學碧靈草終歲自芬芳

還田舍

周捨

薄遊久已倦歸來多暇日未鑿武陵巖先開仲長室松
篁日月長蓬麻歲時密心存野人趣貴使容吾膝况茲
薄暮情高秋正蕭瑟

還東田宅

贈朋離

朱异

應生背芒說石子河陽文雖有遨遊美終非沮溺羣曰
余今卜築兼以隔囂紛池入東陂水窓引北巖雲槿籬

五言古詩 卷二十一
集田鷺茅簷帶野芬原隰何邈迤山澤共氛氲蒼蒼松
樹合耿耿樵路分朝興候巖晚暮坐極林曛憑高眺虹
蜺臨下瞰一作曠耕耘豈直娛衰暮兼得慰殷勤懷勞猶
未彌獨有望夫君

還宅作

蕭欣

時平有道泰世詖交情離寄言謝公叔千載留清規

山中雜詩

二首 一云還山

吳均

山際見來煙竹中窺落日鳥向簷上飛雲從牕裏出
綠竹可克食女蘿可代裙山中自有宅桂樹籠青雲
具區窮地險嵇山萬里餘柰何梁隱士一去無還書

始居山營室

一云始營山居

劉峻

自昔厭諠囂執志好栖息嘯歌棄城市歸來事畊織鑿
戶闕嵯嶢開軒望嶰峒激水簷前溜脩竹堂陰植香風
鳴紫鸞高梧巢綠翼泉脉洞杳杳流一作沈波下不極髮
髴玉山隈想像瑤池側夜誦神仙記旦吸雲霞色將馭
六龍輿行從三鳥食誰與金門士撫心論胸臆

山中

一云詔問山中何所有賦詩以答

陶弘景

山中何所有嶺上多白雲只可自怡悅不堪持寄君

夏日還山庭

陳江總

獨於幽棲地山庭暗女蘿澗漬長低篠池開半卷荷野

五言古詩 卷二十一
花朝暝落盤根歲月多停樽無賞慰狎鳥自經過

歲暮還宅

悒然想泉石驅駕出城臺翫竹春前筍驚花雪後梅青
山殊可對黃卷復時開長繩豈繫日濁酒傾一杯

南還尋草市宅

紅顏辭鞚洛白首入轍
衣乘春行故里徐步采芳蓀逕
毀悲求仲林殘憶巨源見桐猶識井看柳尚知門花落
空難遍鶯啼靜易誼無人訪語默無處敘寒溫百年獨
如此傷心豈復論

春夜山庭

春夜芳時晚幽庭野氣深山疑刻削意樹接縱橫陰戶
對忘憂草池驚旅浴禽樽中良得性物外知余心

山居

徐陵

桃源驚往客鶴嶠斷來賓復有風雲處蕭條無俗人山
寒微有雪石路本無塵竹徑蒙籠巧茅齋結構新燒香
披道記懸鏡厭山神砌水何年溜簷桐幾度春雲霞一
已絕寧辨漢將秦

和從弟祐山家

二首

周王褒

採藥名山頂時節無春冬散雲非一色連崑異衆峰合
沓似無徑間關定有蹤山窓臨絕頂檐溜俯危松空林

五言古詩 卷二十八
鳴暮雨虛谷應朝鍾仙童時可遇羽客屢相逢若值韓
衆藥當御長房龍

結交非俗士仙侶自招攜少華隱日月太乙尋虹霓衆
林積爲籟園竹茂成埤幽谷曙無景荒途晝欲迷滴瀝
寒泉溜呌嘯秋猿啼白雲帝鄉起神禽丹穴栖箭篠時
通徑桃李復成蹊今身得其所羣物可令齊

歸田

庾信

務農勤九穀歸來嘉一廛穿渠移水碓燒棘起山田樹
陰逢歇馬魚潭見酒船苦李無人摘秋瓜不直錢社雞
新欲伏原蠶始更眠今日張平子翻爲人所憐

園庭

杖鄉從物外養學事閒郊窮愁方汗簡無遇始觀爻谷
寒已吹律簷空更剪茆樵隱恒同路人禽或對巢水蒲
開晚結風竹解寒苞古槐時變火枯楓乍落膠倒屣迎
懸榻停琴聽解嘲香螺酌美酒枯蚌藉蘭葭飛魚時觸
釣翳雉屢懸庖但使相知厚當能來結交

幽居值春

山人久陸沈幽逕忽春臨決渠移水碓開園掃竹林欵
橋久半斷崩岸始邪侵短歌吹細笛低聲泛古琴錢刀
不相及耕種且須深長門一紙賦何處覓黃金

寒園卽目

寒園星散居搖落小村墟遊仙半壁畫隱士一牀書子
月泉心動陽爻地氣舒雪花深數尺冰牀厚尺餘蒼鷹
斜望雉白鷺下看魚更想東都外羣公別二疎

山居

寂寥尋靜室蒙密就山齋滴瀝泉澆路穹窿石臥階淺
槎全不動盤根唯半埋圓珠墜晚菊細火落空槐直置
風雲慘彌憐心事乖

山中

澗暗泉偏冷巖深桂絕香住中能不去非獨淮南王

山家


石影橫臨水山雲半繞峯遙想山中店懸知春酒濃

春日園庭

一作梁元帝

隋孫士潛

池萍生已合林花發稍周風入花枝動日照水光浮





卅811.12
2342